

FONDACIJA ZA BIBLIOTEČKU DJELATNOST U SARAJEVU

Na osnovu člana 8. alineja 12. Statuta Fondacije za bibliotečku djelatnost u Sarajevu, V broj: 539/2008 od 18.06.2008. godine, Upravni odbor Fondacije za bibliotečku djelatnost u Sarajevu na 11.sjednici održanoj 24.11.2008. godine donio je

PRAVILNIK O PROCEDURAMA I KRITERIJIMA ZA IZBOR KORISNIKA SREDSTAVA FONDACIJE ZA BIBLIOTEČKU DJELATNOST U SARAJEVU

I – OPĆE ODREDBE

Član 1.

Ovim Pravilnikom o procedurama i kriterijima za izbor korisnika sredstava Fondacije za bibliotečku djelatnost u Sarajevu (u daljem tekstu: Pravilnik) regulišu se oblasti u okviru kojih će se vršiti finansiranje korisnika sredstava, opći i posebni kriteriji dodjele sredstava, te procedure za izbor korisnika sredstava Fondacije za bibliotečku djelatnost u Sarajevu (u daljem tekstu: Fondacija).

II – OBLASTI U OKVIRU KOJIH ĆE SE VRŠITI IZBOR KORISNIKA SREDSTAVA FONDACIJE

Član 2.

- 1.) Otkup društveno vrijednih knjiga domaćih izdavača registriranih na području Federacije Bosne i Hercegovine
- 2.) Opremanje javnih (narodnih, općih, gradskih, općinskih, kantonalnih i matičnih) i specijalnih biblioteka

III – KRITERIJI ZA IZBOR KORISNIKA SREDSTAVA

Član 3.

Izbor korisnika sredstava obavlja se po sljedećim kriterijima:

1. Opći kriteriji:

- kvaliteta programa ili projekta, potvrđen status i značaj;
- funkcionalna i ekonomska opravdanost ;
- nastavak realizacije započetih projekata;
- ravnomjerna regionalna i nacionalna zastupljenost;
- podrška programima i projektima koji imaju potporu lokalne zajednice;
- podrška programima i projektima koji imaju osigurano sufinansiranje;
- broj sudionika i širina prostora djelovanja;
- doprinos promociji i afirmaciji bosanskohercegovačke kulture i kulturnih identiteta;
- doprinos jačanju nacionalne i vjerske tolerancije;
- samoodrživost kandidiranih projekata i programa.

2. Posebni kriteriji

a.) Za otkup društveno vrijednih knjiga izdavača registriranih na području Federacije Bosne i Hercegovine su:

- knjige koje afirmiraju povijesne, znanstvene, kulturne i tradicijske vrijednosti bosanskohercegovačkog društva;
- knjige uglednih i pouzdanih izdavača;
- knjige autora sa društvenim, književnim ili stručnim autoritetom;
- nagrađivane knjige;
- knjige koje su naišle na afirmativan prijem javnosti;
- prve knjige talentiranih mladih autora.

b.) Za opremanje javnih (narodnih, općih, gradskih, općinskih, kantonalnih i matičnih) i specijalnih biblioteka su:

- potreba za popunjavanjem knjižnog fonda novim naslovima;
- potreba za informatičkom opremom za korisnike i zaposlenike;
- umrežavanje u COBISS sistem;
- nedostatak tehničke opreme u biblioteci;
- nedostatak polica za knjige.

IV - PROCEDURE ZA IZBOR KORISNIKA SREDSTAVA

Član 4.

Pravo podnošenja prijava na Konkurs za oblast *Otkup društveno vrijednih knjiga domaćih izdavača registriranih na području Federacije Bosne i Hercegovine*, imaju pravne osobe registrirane na području Federacije Bosne i Hercegovine i fizičke osobe sa stalnim mjestom boravka u Federaciji Bosne i Hercegovine.

Pravo podnošenja prijava na Konkurs za oblast *Opremanje javnih (narodnih, općih, gradskih, općinskih, kantonalnih i matičnih) i specijalnih biblioteka* imaju pravne osobe registrirane na području Federacije Bosne i Hercegovine.

Član 5.

Odluku o usvajanju programa raspodjele sredstava donosi Vlada Federacije Bosne i Hercegovine, na prijedlog ministra Federalnog ministarstva kulture i sporta – Federalnog ministarstva kulture i športa.

Član 6.

Sredstva Fondacije dodjeljuju se kao bespovratna sredstva.

Podnosilac prijave dužan je ispuniti prijavni obrazac, te zadovoljiti ostale uslove u skladu sa ovim Pravilnikom.

Član 7.

Izbor korisnika sredstava Fondacije, u skladu sa ovim pravilnikom, vršit će se na osnovu pristiglih prijava.

Odluku o raspisivanju konkursa donosi Upravni odbor.

Konkurs se mora javno raspisati najmanje jedanput godišnje.

Konkursom se oglašavaju oblasti za koje se odobravaju sredstva korisnicima, uslovi za korištenje sredstava, potrebna dokumentacija i rokovi.

Konkurs priprema i objavljuje Upravni odbor u skladu sa ovim Pravilnikom.

Član 8.

Izbor korisnika sredstava vrši Upravni odbor u skladu sa kriterijima utvrđenim ovim Pravilnikom.

Upravni odbor nije dužan pojedinačno obrazlagati razloge nefinansiranja projekata.

V - VAŽNE NAPOMENE

Član 9.

- Knjige-publikacije ponuđene za otkup moraju imati uredan ISBN Nacionalne univerzitetske biblioteke Bosne i Hercegovine.
- Sva izdanja knjige-publikacije pisana na bosanskom, hrvatskom i srpskom jeziku pisana latiničnim i ćiriličnim pismom bit će ravnopravno tretirani.
- Izdavač može ponuditi za otkup samo ono izdanje knjige-publikacije koje je sam izdao (isključena su trgovinska posredovanja među izdavačima i knjižarskim distributivnim kućama).
- Radi zaštite autora i poštovanja autorskih prava (uključujući i prevoditelje djela) izdavač mora priložiti odgovarajuće potpisani i ovjereni ugovor između izdavača i autora. Upravni odbor Fondacije, odnosno službenici Fondacije, imaju pravo provjeriti dostavljene podatke.
- Ukoliko se radi o prijevodu djela s nekog od stranih jezika, u obzir će se uzeti samo ona djela koja imaju navedeno puno ime i prezime prevodioca.
- Izdanje knjige-publikacije kojom se aplicira za otkup može biti samo iz prethodne kalendarske godine.
- Ukoliko se na konkurs za otkup knjiga pojave iste knjige-publikacije od strane dva ili više izdavača koja udovoljavaju svim navedenim kriterijima, prednost za otkup dijela tiraža imat će onaj izdavač koji za svoje izdanje ponudi: 1. uvjerljiviji prijevod djela ako je riječ o prijevodu s nekog stranog jezika, 2. kvalitetniju opremu knjige i 3. povoljniju cijenu za svoje izdanje.
- Upravni odbor Fondacije, odnosno službenici Fondacije, imaju pravo provjeriti dostavljene podatke.
- Korisnici sredstava imaju obavezu da Fondaciji dostave svu adekvatnu dokumentaciju kojom se dokazuje da su dodijeljena sredstva namjenski utrošena.

VI – ZAVRŠNE ODREDBE

Član 10.

Ovaj Pravilnik stupa na snagu danom objavljivanja u „Službenim novinama Federacije BiH“, a stupanjem na snagu ovog Pravilnika prestaje da važi *Pravilnik o procedurama i kriterijima za izbor korisnika sredstava Fondacije za bibliotечku djelatnost Sarajevo broj: 02-DD-014/08 od 3.9.2008. godine* („Službene novine F BiH“, broj: 61/08).

Broj:02-121/08
Sarajevo, 24.11.2008. godine

PREDSJEDNIK
UPRAVNOG ODBORA

Hadžem Hajdarević

Na osnovu člana 8. alineja 14. Statuta Fondacije za bibliotečku djelatnost V broj: 539/08, broj: 02-111/09 i 02-178/09, Upravni odbor Fondacije za bibliotečku djelatnost, na 25. sjednici održanoj 4. 1. 2009. godine, donio je

**PRAVILNIK
O IZMJENAMA I DOPUNAMA PRAVILNIKA O PROCEDURAMA
I KRITERIJIMA ZA IZBOR KORISNIKA SREDSTAVA
FONDACIJE ZA BIBLIOTEČKU DJELATNOST**

Član 1.

U Pravilniku o procedurama i kriterijima za izbor korisnika sredstava Fondacije za bibliotečku djelatnost (u daljem tekstu: Fondacija) u članu 2. stav 2. iza riječi biblioteka dodaje se „, stručno usavršavanje bibliotekara (putem seminara) i manifestacije za popularizaciju bibliotečke djelatnosti i knjige“.

Član 2.

Član 3. mijenja se i glasi: “Izbor korisnika sredstava vrši se na osnovu općih i posebnih kriterija“.

Član 3.

Iza člana 3. dodaju se novi članovi koji glase:

„Član 3a

Opći kriteriji za izbor korisnika sredstava su:

- kvaliteta programa ili projekta, potvrđen status i značaj;
- funkcionalna i ekonomska opravdanost ;
- nastavak realizacije započetih projekata;
- ravnomjerna regionalna i nacionalna zastupljenost;
- podrška programima i projektima koji imaju potporu lokalne zajednice;
- podrška programima i projektima koji imaju osigurano sufinanciranje;
- broj sudionika i širina prostora djelovanja;
- doprinos promociji i afirmaciji bosanskohercegovačke kulture i kulturnih identiteta;
- doprinos jačanju nacionalne i vjerske tolerancije;
- samoodrživost kandidiranih projekata i programa.

Član 3b

Posebni kriteriji za izbor korisnika sredstava za oblast *Otkup društveno vrijednih knjiga domaćih izdavača registriranih na području Federacije Bosne i Hercegovine, objavljenih u 2009. godini, radi popunjavanja knjižnog fonda biblioteka na području Federacije Bosne i Hercegovine novim naslovima:*

- povijesna, znanstvena, kulturna i tradicijska vrijednost knjige;
- pouzdanost i ugled izdavača;
- društveni, književni ili stručni autoritet autora;
- nagrađivanost knjige;
- afirmativan prijem knjige u javnosti;
- prve knjige talentiranih mladih autora.

Član 3c

Posebni kriteriji za izbor korisnika sredstava za oblast *Opremanje javnih (narodnih, općih, gradskih, općinskih, kantonalnih i matičnih) i specijalnih biblioteka i stručno usavršavanje bibliotekara (putem seminara) i manifestacije za popularizaciju bibliotečke djelatnosti i knjige:*

- a) Posebni kriteriji za *Opremanje javnih (narodnih, općih, gradskih, općinskih, kantonalnih i matičnih) i specijalnih biblioteka:*
 - potreba korisnika i zaposlenih za informatičkom opremom;
 - umrežavanje u COBISS sistem;
 - nedovoljna tehnička opremljenost biblioteke;
 - nedostatak polica za knjige.
- b) Posebni kriteriji za *Stručno usavršavanje bibliotekara (putem seminara) i manifestacije za popularizaciju bibliotečke djelatnosti i knjige:*
 - prezentiranje inovacija u bibliotečkoj djelatnosti;
 - organizovanje seminara i manifestacija iz domena bibliotečke djelatnosti sa već ostvarenom tradicijom;
 - objedinjavanje i koordiniranje bibliotečkog rada na području Federacije BiH;
 - sudjelovanje u popularizaciji i propagandi knjige.“

Član 4.

U članu 4. stav 2. mijenja se i glasi: „Pravo podnošenja prijava na Konkurs za oblasti *Opremanje javnih (narodnih, općih, gradskih, općinskih, kantonalnih i matičnih) i specijalnih biblioteka i stručno usavršavanje bibliotekara (putem seminara) i manifestacije za popularizaciju bibliotečke djelatnosti i knjige* imaju pravne osobe registrirane na području Federacije Bosne i Hercegovine“.

Član 5.

U članu 9. stav 1. mijenja se i glasi: „Izdavači za svaku pojedinačnu knjigu-publikaciju koju ponude za otkup moraju dostaviti i potvrdu da su dostavili 10 (deset) obaveznih primjeraka Nacionalnoj i univerzitetskoj biblioteci Bosne i Hercegovine, kao i da knjiga-publikacija ima validan CIP, ISBN i ID broj. Potvrdu o navedenom će izdavati Agencija za ISBN Nacionalne i univerzitetske biblioteke Bosne i Hercegovine.“

Član 6.

Ova Odluka stupa na snagu danom donošenja.

Broj: 02-6/10
Sarajevo, 4. 1. 2010. godine

PREDSJEDNIK
UPRAVNOG ODBORA

Hadžem Hajdarević